

Htawm tem' ri tuil' ri muk kon' Hkrit Kaw'law'sae'

¹ Htawm ti ok' aen' na ko', meuh ui' Paw'lu meuh peue caee Eun Yesu' Hkrit hot' alo Eun Peucawo' na' maeé Ti'mo'se awng' ui' na' ya,

² ya tem' ri tuil' a ri ec'awng' ku' meuh peue Eun Peucawo' ut' nang veng Kaw'law'sae' ku' kati keutawn' hk'a'naee Hkrit Eun na' pe'.

Kah mun' sin' maeé hk'a' kuit nyawk' kuit sam'ran cumyen' lih neum Kuing' Peucawo' e' na' Eun* na' kue' ri pe' reu'.

Leukah' hk'o' mun' eun Paw'lu

³ Yam hk'o' ya mun' pun pe' na', ya mun' keuting ri Kuing' Peucawo' Eun Cawo' Yesu' Hkrit e' na' Eun laleung. ⁴ Kopti pun ya ri mhawng' lawng hk'a' yum' pe' hk'a'naee Yesu' Hkrit Eun na' maeé lawng hk'a' leumeus'keus pe' peue Eun Peucawo' na' ce na'. ⁵ A meuh hk'a' yum' maeé hk'a' leumeus'keus pucti lih neum hk'a' keutui' hpum' ku' roksa' ri uin' ri pun pe' nang kuing' pang mao' ku' pun pe' ri mhawng' ing' hawc' hk'a'naee leukah' neumneum ku' meuh leukah' mun' ren'kawn ⁶ ku' ing' rot ri pe' na'. Leukah' mun' ren'kawn aen' a buih pli' maeé huk'hawn' pang bhen' keute' na' hk'awp' seun' buih meuh a hk'a'naee pe' na' tang' neum seunyi pun pe' ri mhawng' leukah' mun' ren'kawn na' maeé leuceng pun pe' mun' Eun Peucawo' na' hot' ku' neumneum gawm'euc' kue' hk'a'naee leukah'

* **1:2** 1:2 Nang htawm Seunga' na' ngon' a lah', "Kuing' Peucawo' Eun maeé Cawo' Yesu' Hkrit e' na' Eun."

mun' ren'kawn aen' na. ⁷ Pun pe' ri rin ri ti leukah' mun' ren'kawn na' ri E'pafas' ku' meuh a'mawo leumeus' yeuh mhai' tiduih' mae' ya na' eun. Eun meuh nang yeuh mhai' kati keutawn' ri Hkrit Eun pun ye[†]. ⁸ Eun ku ris ya mhawng' lawng hk'a' leumeus' keus pe' hk'a'nae Cit' seunga' na' yeut.

⁹ Kop awn' na, tang' neum seunyi yam pun ya ri mhawng' lawng pe' na', ya hk'o' mun' pun pe' un' laee deut. Kah Peucawo' Eun yeuh pe' htonnuk ri cu'yi ka alo Eun na' ri cu'yi mae' hk'a' cang yawng ka hk'a' civit na' reu'. ¹⁰ Hk'o' ya mun' yeuhki' na' meuh a punta kaw pe' a'yu im' kuing'hpaw mae' meuh pe' peue Eun Peucawo' na' mae' punta kaw pe' hit' hpum' Eun ri hk'a' ku ceu na' mae' meuh a punta kaw pe' kue' pli' hk'a'nae kan' chak' ku ceu na', huk'hawn' hk'a'nae cu'yi yawng Peucawo' Eun na', ¹¹ kaw'reng keuting ri cu kaw'reng Eun na' gawm'euc' hot' ti'ca kue' munhpung' Eun na' punta kaw pe' cang yeun'hkam nyawk' mae' ren'kawn kuit nyawk' kuit sam'ran ¹² mun' keuting ri A'kuing' Cawo' yeuh Eun pe' kuing'hpaw mae' kaw pe' pun ri rap ri ti sin' tiduih' mae' peue Eun hk'a'nae kuing' ka ku' ceng' na'. ¹³ Kopti teum'kawm Eun e' pon hk'ai' kuing' ka hk'a' duim'lawng na', mae' va e' lec kuing' Eun Kon' ai' leumeus' Eun na'. ¹⁴ Hk'a'nae Kon' ai' awn' Eun, e' pun ri rap ri ti hk'a' htut lawtpon[‡] na', hk'a' htut lawtpon na' a meuh hk'a' ploer' map' na'.

Hkrit keuting Eun hk'ai' peue

¹⁵ Kon' ai' meuh Eun ruprang Eun Peucawo' Cawo' nyu un' pun na' meuh Eun Kon' ai' hk'a' pang ka ku' hpanpleng'

[†] 1:7 1:7 Nang htawm Seunga' na' ngon' a lah', "pe". [‡] 1:14 1:14 Nang htawm Seunga' na' ngon' a lah', "Pun ri rap ri ti hk'a' htut lawtpon na' ri nham' Eun na'."

ri na' ku ceu ka. ¹⁶ Kopti meuh a Heun ri, ku ceu na' a pun ri hpanpleng' ri gawm' ku' kue' pang maó' na' maeé' pang bhen' keute' na', gawm' ku' cang nyu ri na' maeé' ku' un' cang nyu ri na', cawó' u'peung ten na' ce, a'ko' cawó' tí'ca keuting na' ce, a'ko' cawó' u'peung na' ce, a'ko' cawó' an'nya keuting na' ce. Ku ceu gawm'euc' na' Eun hpanpleng' a, a meuh pun Heun. ¹⁷ Eun á'yu im' tang' neum nanggal' ka yam keunhaw' na' un' nang kue' ka na'. Hk'a'naee Heun na', ku ceu gawm'euc' na' a cawp'maen hkaw puri. ¹⁸ Eun meuh cing' ka jawngkuí' tu', cing' ce muk kon' Hkrit na'. Punta kaw Eun meuh Cawó' tisut' hk'a'pang ku ceu na', Eun meuh vang la ri tang' na' maeé' Eun meuh nang kuh' im' hk'ai' vang yeum na' nanggal'. ¹⁹ Kopti ku' htonnuk kue' hk'a'naee Peucawó' Eun na' gawm'euc' a ku kue' hk'a'naee Kon' ai' na' Eun yeut. ²⁰ Ku' kue' pang bhen' keute' na' maeé' ku' kue' hk'a'naee kuing' pang maó' na' gawm'euc' kaw a tang htuk'lung Eun kopti meuh a Kon' ai' Eun na', a hit' ri hpum' Eun. Hk'a' kuit nyawk' kuit sam'ran cumyen' aen' kue' a neum nham' Eun Kon' ai' ku' bah lih neum kleum' rawng'tawp' na'.

²¹ Nanggal' aen' na tawn hk'akcak' pé' Peucawó' Eun, pé' meuh ransu ri Heun hk'a'naee hpum' ri kopti yeuh pé' ku' rai na'. ²² Daecti maet'maen', punta kaw Eun ap tu' pé' na' meuh peue seungá' chak' un' kue' vang ri, un' kue' vang tang' map' nanggal' Eun na', Eun tang yeuh pé' htuk'lung cawp'maen ri ri jawngkuí' tu' Eun Hkrit ri hk'a' yeum Eun na'. ²³ A saec' yeuh sa'nhaw', pé' kaw kah ri á'yu im' hot' hk'a' yum' pé' na', cawng keutawn' un' fuii'fai' hk'ai' hk'a' keutui' hpum' kue' hk'a'naee leukah' mun' ren'kawn na'. Aen' a meuh leukah' mun' ren'kawn pun pé' ri mhawng', pun pé' ri paó' a ri ku' á'yu im' ku ceu ku' pun ri hpanpleng' ri ut' hk'a'ruim ka kuing' pang maó' na'. Uí' ri, meuh uí' Paw'lu. Uí' meuh mhai' ka leukah' mun' ren'kawn aen' na.

Paw'lu sae'caee' co'ca' eun ri yeuh kan'pun muk kon' Hkrit

²⁴ Maet'maen', ren'kawn uí' maeé' ku' pun uí' ri hkam' hk'a' tukhka pun pe' ná'. Ku' tukhka Hkrit pun Eun ri hkam' ku' kawn' vang ná', buih seue' uí' a htonnuk hk'a'naee tu' ri ná' pun jawngkuí' tu' Eun ná'. Jawngkuí' tu' Eun ná' meuh a muk kon' Hkrit ná' ce. ²⁵ Keut' uí' ri meuh mhai' ce muk kon' Hkrit ná' hot' ku' Peucawo' kah Eun uí' pao' leukah' ri ná' htonnuk ri pe'. ²⁶ Leumah' ti cu hawc' ti cu ná', leukah' Eun Peucawo' aen' a meuh leukah' mo' vangdoh' rui' ri ná', daecti maet'maen' Eun tuh' peue ri ná' ce nyu a hawc'. ²⁷ Peucawo' sum' kah Eun peue ri ná' ce yawng sum' tuil' Eun peue un' meuh peue ceu Yu'da ná' ce yawng leukah' vangdoh' rui' ri ná'. Leukah' vangdoh' rui' Eun ná' a meuh Hkrit ut' Eun hk'a'naee pe'[§] ná', a meuh hk'a' keutuí' hpum' kaw pe' pun ri rap ri ti munhpung' tiduih' maeé' Heun ná'.

²⁸ Punta kaw e' ap peue ku peue ná' peue meuh peue chak' htonnuk hk'a'naee Hkrit Eun ná', e' pao' lawng Eun ná', e' sangsawn' tuil' sati peue ku peue ná' ce ri cu'yi ná' gawm'euc'. ²⁹ Pun vang keutuí' hpum' aen' a ná', uí' sae'caee' co'ca' ri yeuh kan' ri cu uí' kaw'ring Eun ná' gawm'euc' ku' buih yeuh kan' tí'ca reng hk'a'naee uí' ná'.

2

¹ Uí' cí' pe co'ca' ri pun pe', pun ec'awng' veng Laodisia maeé' pun peue un' duing nyu uí' ná' ce gawm'euc' a'neng ná', uí' sum' kah pe' yawng a. ² Vang keutuí' hpum' uí' ná' meuh a tuil' kaw'ring ce ná', kah ce tuil' kaw'ring puri hk'a'naee hpum' ri, htuk'lung puri hk'a'naee hk'a' leumeus'keus ná' maeé' kaw ce yawng hk'a' leuceng ri pun htonnuk ná'. Ceu nang aen' a meuh punta kaw ce pun ri yawng vangdoh' rui' Eun Peucawo' ná', meuh a Hkrit Eun.

[§] 1:27 1:27 Pe' lah' ka ná', lah' a peue un' meuh peue ceu Yu'da ku' yum' Peucawo' Eun ná' ce.

³ Dom'ka peuyhá' cu'yi maeé' hk'a' cang yawng gawm'euc' na' mo' a ri hk'a'naee Hkrit Eun. ⁴ Lah' uí' a yeuhki' na' meuh a punta a'nhaw' kaw peue un' cang cop' ri pun pé' ri leukah' hk'o'sum' yum' na'. ⁵ Kopti tu' uí' na' a saec' na' un' ut' maeé' pé' ko', daecti hpum' uí' na' a ut' maeé' pé'. Pun uí' ri nyu ut' pé' cawp' hk'a' cawp' hk'ong' ri na' maeé' yum' keutawn' pé' hk'a'naee Hkrit Eun na', uí' ren'kawn.

Hk'a' htonnuk hk'a'naee Hkrit Eun

⁶ Kop awn' na, kopti pun pé' ri rap ri ti Yesu' Hkrit meuh Eun Peucawo' ri hawc' na', a'yu im' heul' hk'a'naee Heun, ⁷ jheum' res ri na' maeé' yeuh ri keuting huk'hawn' hk'a'naee Heun, yeuh ri kaw' reng keuting hk'a'naee hk'a' yum' hot' seun' ku' pun pé' ri rin ri ti na', maeé' yeuh ri nukveh ri leukah' mun' keuting na' reu'.

⁸ Uin' sati ri meulamlam ri reu', pawlaee kah a'nhaw' ing' mheut' ri ti pé' meuh mhai' ri ri leukah' cu'yi ku' un' kue' vangdoh' na' maeé' ku' chí'lai na'. Leukah' awn' meuh a ritroe yeuh peue ing' ti cu hawc' ti cu hot' kleum' ka bhen' keute' aen' na, a hkuin' to' ri ri Hkrit Eun.

⁹ Kopti ruprang Eun Peucawo' na' gawm'euc' kue' a htonnuk hk'a'naee jawngkuí' tu' Eun Hkrit na'. ¹⁰ Pun pé' ri rap ri ti hk'a' htonnuk na' hk'a'naee Hkrit Eun. Eun meuh cing' hk'a' pang ce cawo' u'peung maeé' cawo' an'nya keuting ku peue na' ce. ¹¹ Pé' ku pun ri rap ri ti hk'a' ton' duing' hak' ri na' hk'a'naee Heun. A meuh hk'a' raws' ri tec map* na'. A hkuin' meuh hk'a' ton' duing' hak' yeuh peue ri tí' ri, daecti a meuh ku' yeuh Eun Hkrit. ¹² Pé' ku pun ri puing' ri maeé' Heun hk'a'naee rap pé' ri ti hk'a' cum' na'. Eun yeuh pé' tang kuh' im' maeé' ti ri hk'a' yum' pé' hk'a'naee tí'ca Eun Peucawo' Cawo' yeuh Hkrit Eun tang kuh' im' na' Eun.

* 2:11 2:11 A'ko' hk'a' nham' keune

¹³ Yam yeum pé' hk'a'naee map' ri na' maeé' hk'a'naee map'† ka un' pun ri rap ri ti hk'a' ton' duing' hak' na', Peucawo' yeuh Eun pé' a'yu im' maeé' Hkrit Eun tiduih'. Eun ploé' ri tec map' e' na' gawm'euc' ka. ¹⁴ Eun yeuh htawm yeuh kati sat'ca' ku' mawt e' ri ritroe ku' ham'tap to'tam' e' na' ce meuh ku' hk'o'hk'awng'. Eun ti ri tawk' ri tec htawm aen' na pang kleum' rawng'tawp' na'. ¹⁵ Eun ku' ti cawo' u'peung maeé' cawo' an'nya keuting na' ce hk'uic'. Eun pya ce nanggal' peue heun' na' maeé' Eun pe ce ri kleum' rawng'tawp' na'.

¹⁶ Kop awn' na, pawlaee kah a'nhaw' taws' a'mu ri pé' ri ku' hk'a, ku' som' pé', a'ko' lawng pawe to' ri hk'a' ritroe na', a meuh pawe hk'eng chí', a'ko' pawe seunyi Sin' na'. ¹⁷ Ceu nang aen' gup meuh a a'lawng ka ku' kaw'n kaw ing' hk'a'kui' na'. Daecti hk'a' neumneum na' sok ri nyu a hk'a'naee Hkrit Eun. ¹⁸ Pawlaee kah peue sawng' guil ri meuh peue hpum' onawn' faeé' in'hpom na' ce ing' yeuh pé' un' cang rap ri ti lapsawng' na'. Peue awn' meunui'meunui' ce lah' ris lawng ku' nyu ce na'. Ce hpum' keuting ri kamkuit ku' un' kue' peuehot' hot' hpum' ka hk'a' nham' keune ri na'. ¹⁹ Ce seun' jawngkui' tu' un' to' ri ri Cawo' ku' meuh cing' na' Eun ko'. Cawo' aen' Eun meuh Cawo' yeuh jawngkui' tu' gawm'euc' na' to' ri ri puri ri jhawng' na' maeé' seunak na'. A yeuh jawngkui' tu' awn' a keuting huk'hawn' hot' seun' ku' Peucawo' kah Eun a keuting huk'hawn' na'.

²⁰ Kopti pun pé' ri yeum maeé' Hkrit Eun, pé' pun ri pon hk'ai' kleum' ka ritroe ka bhen' keute' na' hawc' na', a ci' meuh kop keunhaw' pé' vaeé' kaw'n meung ut' ri hk'a'ruim ka ritroe na' seun' kaw'n meuh pé' is' ka bhen' keute' na'? ²¹ U'hpama ri, ritroe na' lah', "pawlaee ti, pawlaee cim, pawlaee paic'". ²² Ritroe aen' ce peue lawn yeuh a hawc'

† 2:13 2:13 A'ko' hk'a' nham' keune

ko', kaw a yeng ri lulaic rai' heul' meun, kopti tang' a ri uin' ri hk'a' pang ka leukah' tuil' leukah' sangsawn' peue na'. ²³ Neumneum ka na' ko', ritroe aen' seun' a kue' a cu'yi ko', ce faee' hk'o' mun' hot' ku' tang' ce ri uin' na', ce guil ri onawn' mae' keunhap' nokneh tu' ri na' meun. Ceu nang aen' ce a hkuin' kue' mun' pun kaw u'peung hk'a' ta'nha' nham' keune na' saec' peunaé.

3

A'yu im' hk'a'naee hk'a' seunga' chak'

¹ Kopti pun pé ri tang kuh' im' mae' Hkrit Eun hawc' na', kah hpum' pé na' kuit yawo pal ku' ut' pang lhung' vang Hkrit ut' Eun hk'a' ti' a'tawm' Eun Peucawo' na' reu'.

² Kah kamkuit pé na' kuit yawo pal ku' ut' pang lhung' na' reu', un' mak' kuit ku' hk'a' bhen' keute' na'. ³ Kopti yeum pé hawc', daecti maet'maen' civit pé na' a mo' ri mae' Hkrit Eun hk'a'naee Peucawo' Eun. ⁴ Yam Hkrit Cawo' meuh Cawo' civit pé* na' tang puc Eun ri lih na', yam awn' na pé ku kaw pucti lih mae' Heun hk'a'naee munhpung' na' yeut.

⁵ Kop awn' na, toh ri tec hk'a' ta'nha' bhen' keute' pé na' reu', meuh a hk'a' hkuit'nawng'tang', hk'a' un' seunga' chak', kuh'nga, kue' hpum' sum' yeuh ku' rai mae' law' hpa keuting, law' hpa keuting na' sawn' a ri meuh hk'a' faee' ruphtu na'. ⁶ Kopti meuh a ceu nang aen' ce na', hk'a' seungeueng' Eun Peucawo' na' a buih ing'†. ⁷ Nanggal' aen' na, pé ku tawn a'yu im' hk'a'naee hk'a' aen' na yeut. ⁸ Daecti maet'maen', pé na' htuk' ri tecla ceu nang aen' ce hk'ai' tu' ri na' gawm'euc' ka, a meuh hk'a' seungeueng' peulel, hpum' ha' hpum' vae, sum' kah peue sui', lah'

* **3:4** 3:4 Nang htawm Seunga' na' ngon', a lah', "e" † **3:6** 3:6 Nang htawm Seunga' na' ngon', a lah', "a buih ing' ri peue lheu' leukah' Eun Peucawo' na' ce."

ku' un' muis un' tuing ri peue maeé lah' leukah' seueum' seueú na' pucti lih hk'ai' moeng ri na'. ⁹ Pawlaeé chí'lai puri, kopti raws' pé' ri tec tu' hk'im' ri na' maeé' ku' yeuh hk'im' pé' na' tiduih' hawc', ¹⁰ maeé' cuip' pé' jawngkui' tu' hk'u' ku' buih hpanpleng' hk'u' ri hot' seun' ruprang Eun Cawo' hpanpleng' na', a meuh punta kaw pé' gawm baet ti yawng Eun heun' na'. ¹¹ Kop awn' na, a hkuin' kue' peue Helasa', a'ko' peue Yu'da, peue ton' duing' hak' ri, a'ko' peue un' ton' duing' hak' ri, peue ceu seubu, peue nang hk'i‡, peue meuh mhai', a'ko' peue un' meuh mhai'. Daecti Hkrit meuh Eun ku ceu, Eun ut' hk'a'naeé peue ku peue.

¹² Kop awn' na kopti meuh pé' peue Peucawo' leuk Eun ri uin', meuh peue seungá' chak' maeé' meuh peue Peucawo' leumeus' Eun na', cuip' hk'eung hk'a' cang tukyak, hk'a' teum'kawm peue, hk'a' hpum' onawn', hk'a' hpum' nyom' jom maeé' hk'a' cang yeun' hkam na' reu'. ¹³ Yeun' hkam ri puri reu'. Pé' saec' na' kue' hpum' ri puri kopti keunhaw' na' un' lah', ploé' map' pu pé' reu'. Ploé' map' pu pé' seun' Peucawo' ploé' Eun map' pé' hawc' na' reu'. ¹⁴ Cuip' hk'eung hk'a' leumeus' keus na' kang' ku' chak' aen' ce gawm'euc' reu'. Hk'a' leumeus' keus na' mawt a ceu nang aen' ce htonnuk meuh yawo' keuhti.

¹⁵ Punta kaw pé' pun ri rap ri ti hk'a' kuit nyawk' kuit sam'ran cumyen' Eun Hkrit na' kopti Peucawo' klawng Eun ri ti pé' meuh yawo' jawngkui' tu' keuhti na', kah hk'a' kuit nyawk' kuit sam'ran cumyen' aen' a u'peung hpum' pé' na' reu'. Yeuh ri kue' hpum' mun' keuting na' reu'. ¹⁶ Yam sangsawn' maeé' tuil' pé' sati ri cu'yi gawm'euc' na', maeé' yam cai pé' seng' leukah' suk'seun', htawm suk'seun' maeé' seng' htawm hk'a' civit hk'a'naeé kuit rot ri mun' Eun Peucawo' na', kah leukah' Eun Hkrit na' kue' htonnuk hk'a'naeé pé' reu'. ¹⁷ Pé' saec' na' yeuh ceu

‡ 3:11 3:11 A'ko' peue Sí'hti'

nangnhaw' na' un' lah', leukah' leupong, a'ko' yeuh kan', yeuh a hk'a'naee muis Eun Cawo' Yesu' na' gawm'euc' ka, mun' keuting ri A'kuiing' Peucawo' Eun ri Yesu' Eun reu'.

Ku' nyahk'ul' kon' Hkrit kuing' ce ri yeuh

¹⁸ Beun' na' pe', yawm' ri leuceng ri ti leukah' ce me ri na' reu'. Aen' cawp'maen a hk'a'naee Peucawo' Eun.

¹⁹ Me na' pe', leumeus' beun' ri na' ce reu'. Pawlaee yeuh ku' reng ri ce.

²⁰ Kon' na' pe', leuceng ri ti leukah' ce makuiing' pe' na' ku ceu ka reu'. Kopti ceu nang aen' ce htuk' a hpum' Eun Peucawo'.

²¹ A'kuiing' na' pe', pawlaee yeuh kon' pe' na' ce hpum' sui'. Kopti kaw ce cang hpum' aet'.

²² Mhai' na' pe', leuceng ri ti leukah' ce ro' cawo' hk'a' bhen' keute' pe' na' ku ceu ka reu'. Punta kaw a htuk' hpum' ce na', pawlaee kah a meuh nanggal' to' nha' ce na' palkoe. Daecti yeuh a ri hk'a'naee puin ka hpum' ri na' mae' ri hk'a' lhat' til ri Peucawo' Eun na' reu'. ²³ Pe' saec' na' yeuh ceu nangnhaw' na', yeuh a ri sut' ka hpum' ri na' seun' yeuh pe' a ri Peucawo' Eun na' reu', pawlaee kah a seun' yeuh pe' a ri peue na'. ²⁴ Kopti tup yawng pe' kaw ri pun sin' ku' meuh lapsawng' na' ri Peucawo' Eun. Hkrit aen' meuh Eun ku' buih yeuh pe' mhai' Eun na'. ²⁵ A'nhaw' lawn yeuh ku' kleuc' na' ko', eun kaw pun ri rap ri ti tut ka na' hot' ku' kleuc' yeuh ri na'. Peucawo' hpaw Eun ca' keue' ri buh peue.

4

¹ Cawo' na' pe', yeuh ku' chak' mae' ku' leupaws seumeu' na' ri mhai' pe' na' ce reu'. Kopti tup yawng pe' kue' ri Cawo' ut' nang kuing' pang mao' yeut.

Bae leukah' sangsawn'

² Saec' yamnhaw', hk'o' mun' reu'. Yam hk'o' pe' mun' na', yeuh ri pawn ku' ri mae' kue' hpum' mun' keuting ri Peucawo' Eun reu'. ³ Punta kaw ye cang ris leukah' vangdoh' rui' Eun Hkrit ku' pun ui' ri hkam' hk'a' hk'awng' ri pun a na', hk'o' mun' pun ye reu', kah Peucawo' Eun tah' leuva' ka ku' buih sangsawn' ye na'. ⁴ Punta kaw ui' cang pao' lawng awn' a glih'gleueng' hot' seun' ku' kuing' ui' ri yeuh na', hk'o' mun' pun ui' reu'. ⁵ Yeuh ri kue' cu'yi lo' a yeuh peue hk'a'nok na' ce cang meuh kon' Hkrit reu'. Lo' yam pun pe' ku yam na' kue' mun' htonnuk reu'. ⁶ Kah leukah' lah' pe' laleung na' kue' mun' htonnuk reu'. Punta kaw pe' cang yawng ku' kaw ri top' leukah' peue na' yeuh sa'nhaw' na', hkawo' a is' cis yeuh a kue' rasa' reu'.

Leukah' tisut'

⁷ Tai' hki'kas' eun kaw ris pe' mhawng' lawng ui' na' gawm'euc' ka ri pe'. Eun meuh awng' leumeus' ui'. Eun meuh nang kati keutawn' yeuh kan' Eun Peucawo' mae' meuh a'mawo nang yeuh kan' Eun Peucawo' tiduih' mae' ui'. ⁸ Punta kaw pe' yawng lawng ui' na'* mae' kaw eun tuil' kaw'reng pe' na', ui' rangraen ri kaw cus' eun heul' ri pe'. ⁹ Eun kaw heul' meu mae' Onesimas' ku' meuh awng' kati keutawn' leumeus' ui' na' eun. Eun ku meuh peue hk'a'naee pe' ti peue. Ka kaw ris pe' mhawng' lawng ka ku' kue' ku' meuh maen' na' gawm'euc' ka.

¹⁰ Aritahkas' meuh a'mawo mae' ui' nang htawng' na' eun mae' Maku' eun ka ku tawm' a ka lah' ri leunyeng ri pe'. Maku' mae' Banabas' ka meuh kon' ec' kon' awng'. (Ui' ku tawn lah' a ri pe' hawc', Maku' eun lawn ing' ri pe' ko', rap ri ti eun meulamlam ri reu'.) ¹¹ Yesu' ku' muis seubu eun a meuh Yutas' na' eun ku tawm' a eun lah' ri leunyeng ri pe'. Hk'a'naee ce muk a'mawo yeuh kan'

* **4:8** 4:8 Nang htawm Seunga' na' ngon', a lah', "punta kaw eun yawng lawng pe' na'"

pun kuing' Eun Peucawo' mae' ui' na' ce, a kue' yawo peue loe' peue awn' meuh ce peue ceu Yu'da. Ce tuil' kaw'l'reng ui' nyawk'. ¹² E'pafas' meuh peue hk'a'naee pe' ku' meuh mhai' Eun Yesu' Hkrit na' eun ku tawm' a eun lah' ri leunyeng ri pe'. Punta kaw pe' cawng keutawn', keuting hk'a'naee hk'a' civit na' mae' hpum' keutawn' htonnuk hk'a'naee alo Eun Peucawo' na' gawm'euc' ka, eun hk'o' mun' pun pe' laleung. ¹³ Lawng sae'caee' yeuh eun kan' reng pun pe' na' mae' pun peue veng Laodisia mae' peue veng Hierapolis' na' ce, ui' ku cang hkam' sa'hki' ka yeut. ¹⁴ Lu'ka seura' bai' ku' meuh a'mawo leumeus' e' na' eun mae' Demas' na' eun ka ku tawm' a ka lah' ri leunyeng ri pe'. ¹⁵ Ec'awng' ut' nang veng Laodisia na' ce, mae' Numfa' ka mae' muk kon' Hkrit hk'om puri nang nya ka Numfa' na' ce, hk'o' pe' lah' ce mhawng' leunyeng ui' ri ce. ¹⁶ Pe' lawn hawc' lip htawm aen' a ko', pe' ku na' tang tuil' muk kon' Hkrit Laodisia na' ce lip a. Saec' meuh htawm ing' neum veng Laodisia na', pe' ku na' lip a yeut. ¹⁷ Lah' a ri Ahki'pas' eun, "Yeuh kan' pun mi hk'a'naee Peucawo' Eun na' rot ti hawc' htonnuk ka reu'." ¹⁸ Ui' ri, meuh ui' Paw'lu. Ui' tem' leukah' keutui' hpum' aen' na ri ti' ri na' meun. Kuit rot ri mu' lhec' ui' na'. Kah mun' sin' na' kue' ri pe' reu'.

Plang
The New Testament in the Blang language of Myanmar

copyright © 2021 Wycliffe Bible Translators, Inc.

Language: Plang (Blang)

Contributor: Wycliffe Bible Translators, Inc.

All rights reserved.

2021-04-06

PDF generated using Haiola and XeLaTeX on 19 Oct 2021 from source files dated 14 Jul
2021

0468b0b5-acb2-59c4-92d3-4fa09a4d091c